

Кітапханаға қыран бүркітін алып келіпті

Лаура ПЛЕУБАЙҚЫЗЫ

«Қан сонарда бүркітші шығады аңға» деп жаттаған Абай аталарының өлеңіндегі шынайы кейіпкермен кездесу мектеп оқушыларына ерекше әсер етті.



– Балалардың саятшылық туралы ұғымы мектеп қабырғасында қалыптасқанымен, осы өнердің иесімен кездесу бір бөлек. Ал саятшылықты өмір салтына айналдырып, қанға сіңген құсбегілік өнерімізді өшірмей келе жатқан Архат Қиялбекұлының өскелең ұрпаққа айтары мол, – дейді Өскемендегі облыстық балалар мен жасөспірімдер

кітапханасының қызметкері Құралай Камалиева.

Айта кетейік, бұл балалар мен жасөспірімдер кітапханасының ұлттық құндылықтарды дәріптеу мақсатында өткізіп отырған бірінші шарасы емес.

Құмай тазы, қыран бүркіт пен тұлпардың иесі Архат Қиялбекұлының саятшылық, құсбегілік туралы айтқан әңгімелерін оқушылар ұйып тыңдады. «Алып» атты бүркіт пен «Сұңқар» атты құмай тазымен танысқан балалардың аңшыға қойған сұрақтары да аз болмады.

– Маған әсіресе Архат ағаның «Алып» атты бүркітті алғаш рет ұядан алғаны туралы әңгімесі қатты әсер етті. Бүркіттердің жан баспаған шырқау шыңдарда балапан басатынын білмеппін. Ағаның осы бүркіттің балапанын алу үшін биік құзға өрмелеп шығуы тіпті батырлық сияқты елестейді, – дейді №20 мектептің оқушысы Алдияр.

Өскемен.